



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 3

**Taoba Bangladesh PM Hasina tasüba
agi merenshitsü obendang agütsü**

**Nitish-i resignation agütsüogo;
sorkar tasenba yakta kümtettsü**



VOL. XXIII ISSUE NO. 42 (ADOK 42) DIMAPUR SANGTENNÜ (TUESDAY) YIMPOKSÜI (NOVEMBER) 18, 2025 ₹ 5.00

NPSC Chairman aser Members shimtsüla: NSF

Dimapur, November 17, 2025 (TYO): Naga Students' Federation (NSF)-i Nagaland Public Service Commission (NPSC) nung Chairman aser Members shimtsü takhangba agütsüogo.

"September 13, 2025 nü NPSC Chairman aser Members mapa nungi sodi agiogo saka tanü tashi parnok melenzükerterem meshim. Iba ajanga Commission ketdangsubaren nung kongshir aser tatidang agütsünürtemi tetsükdaktsü ajurur, talisa upper age limit criteria nung timtem

angur" ta NSF-i Nagaland Chief Minister dangi shidi ka zülüogo. Mapang menuba ajanga examination calendar nung timtem agütsüba dang masü saka tatidang agütsüsupurtem taginüba aser tarutsü raksatsür ta NSF-isa ashi.

Anungji NPSC timi ketdangsuba aser inyangshia aotsü atema Chairman aser Members tekaratiba nung shimtsü mepishir ta President Mteisuding aser Asst. General Secretary Veze Tunyi nati shidi nung metetdaktsüogo.

Naga Common Platform nung adentsü ayongzüker

Dimapur, November 17, 2025 (TYO): Naga yimjung maparen atsülangba aser yimten latettsü takhangba atema November 18, 2025 nü Naga Common Platform ayongzüker.

Iba sentong ayongertemi tanü osangbener den jembidang "Forum for Naga Reconciliation (FNR) ajanga putepshitsü atema inyakba ajembangtsü atema iba sentong ayongzükerba masü" ta ashi.

FNR-i inyakba den toktepa parnok i ba mapa inyaker ta ashibaji tai lir kechiyong onoki FNR ajanga inyakba mapa akhümtsübur ta parnokisa ashi.

Naga Common Platform ya Nagaland Gaon Boras Federation ajanga ayongzüker aser parnok ashiba agi tatembang lemtet ka agütsü atema nisung ajak adentsü nüngdaker.

Naga kin ajak aser sendaktepa alirtemi iba sentong nung adentsü

mepishir ta NGBF-isa metetdaktsüogo.

DOKANTEM SHIBANGTSÜ MEPIHSHIR

November 18, 2025 nü Agri Expo, Chümoukedima nung Peace Committee, Nagaland GB Federation ajanga common platform ayongzükerba atema Dimapur district nung shishilembartemi anepdang 10:00 ako nungi anüngdang 12:00 tashi dokantem shibangtsü mepishia metetdaktsüogo.

Iba temepishiba ya Dimapur District GB Association, GB Union Dimapur Sadar, aser Dimapur District Citizen's Forum ajanga agütsü.

Parnokisa Dimapur District Chamber of Commerce and Industries dang shishilembartemi common platform nung adentsü atema tayongzükerba agütsütsü mepishia metetdaktsüogo.

Dimapur traffic tajungba akümer

Dimapur, November 17, 2025 (TYO): Dimapur nung traffic management infrastructure ulushiogo aser iba ya Deluxe Point aser Dhobinalla junction nung improvised traffic control systems ana lapokba ajanga lir.

Hombarnep Commissioner of Police, Dimapur, Aotula T Imchen aser Dimapur Deputy Commissioner Dr. Tinojongshi Chang nati iba system lapoktsü.

"Tongtipang lenjemtem nung traffic lights enokba ya Dimapur nung traffic tayongzükerba koktettsü aser lendong nungi jenbua alitsü system ka tenzükerba lir" ta Commissioner of Police Aotula-i ashi.

Tarutsü nung public safety tajungba akümtsü atema tongti tesemtem nung Automatic Number Plate Recognition (ANPR) CCTV cameras enoktsü aser awareness campaigns agütsü ta lai ashi.

"Tanü traffic lights tasen enokba ya micro-action plan ka nung shilem ka lir. Iba sentong nung ANPR CCTV cameras enoktsü tebilemba lir" ta Deputy Commissioner of Police (Traffic), Meren Chenth-ia ashi.

Nagaland Pollution Control Board (NCAP) committee-i iba tebilemba agizükerba sülen traffic lights enokogo aser tarutsü nung CCTV cameras enoksemtsü ta Meren Chenth-isa ashi.

EC-i Assam nung Special Revision asütsü tuyur

Guwahati, November 17, 2025 (Agencies): Election Commission of India (ECI)-i Assam nung electoral rolls atema 'Special Revision' asütsü tetuyuba agütsüogo.

Assam nung sangküm assembly elections agütsü lir aser iba atema ECI-i November 17, 2025 nü tetuyuba agütsü.

Iba revision exercise atema qualifying date ji January 1, 2026 asütsü ta ECI-i Assam Chief Electoral Officer dangi shidi zülüoo.

Iba Special Revision ya annual

special summary revision aser Special Intensive Revision (SIR) tsüngda lir ta ECI ketdangsurtemi ashi.

Taoba ita ECI-i Chhattisgarh, Goa, Gujarat, Kerala, Madhya Pradesh, Rajasthan, Tamil Nadu, Uttar Pradesh, West Bengal, Puducherry, aser Union Territories of Andaman & Nicobar Islands aser Lakshadweep atema SIR agütsü tetuyuba agüja liasü.

Tamil Nadu, Puducherry, Kerala aser West Bengal nung 2026 küm assembly elections agütsü.

UK-i Hornbill Festival 2025 nung Country Partner asütsü



Alison Barrett MBE, Chief Minister Neiphiu Rio aser Lindy Cameron CB OBE nung külemi agiba noksa ka angur.

New Delhi/Kohima, November 17, 2025 (TYO): Hornbill Festival 2025 (1-10 December) nung United Kingdom-i Country Partners ka ama shilem agütsü atema Nagaland sorkar aser British Council tsüngda tenangzüktep nung sign sütepogo.

British Council ya UK asoshi cultural relations and educational opportunities atema international organization lir.

Iba tenangzüktep ajanga partner ana tsüngda sobaliba lemsateptsü, creative talent yarütsü aser alima jenjang nung Nagaland senmang sayutettsü atema lir.

Iba tenangzüktep nung Chief Minister Neiphiu Rio aser Country Director India, British

Council Alison Barrett MBE nati sign asü. Iba mapang British High Commissioner to India Lindy Cameron CB OBE liasü.

Iba ajanga British Council-i Kolkata nung aliba British Deputy High Commission den külemi yaritepa benjung nung yariteptsü. Taoba mapang ama British Council-i UK nungi artist tem anir arur Hornbill Festival nung shilem agidaktsütsü.

December 2, 2025 nü Scottish artist Ruairidh Maclean (RuMac)-i shilem agütsü.

"Taküm Hornbill Festival nung United Kingdom-i asen Country Partner ama shilem agütsüba Nagaland-i pelashishia agizüker. Iba tesentaktep ajanga asenok külem tangatetba aser

sobaliba lemsatepba den nisung o nisung tsüngda sendakteptsü inyakba sayur. UK-i shilem agiba ajanga benjung tali meraketdaktsütsü aser culture, tourism, education, o enterprise atema lenmang lapoktsü" ta Neiphiu Rio-i ashi.

"UK-i maneni Country Partner ka ama Hornbill Festival yarütsü atema nüma atanger. UK aser India tsüngda iba tesentaktep takang ajanga asenok tsüngda apu alar. Yaküm Hornbill Festival küm 25 ajungdang Welsh, Naga aser Khasi artists külemi shilem agi aser taküm Scottish music ajanga shilem agütsü asoshi pelar" ta British High Commissioner to India Lindy Cameron, CB OBE-i ashi.

"Hornbill 2025 atema Nagaland sorkar den sendaktepba atema pelar. Iba ajanga UK artists aser mongintemi India nung nisung temeyoktep angatettsü aser maneni Nagaland nung alirtem den sendaksemtettsü" ta Director India, British Council Alison Barrett MBE-ia ashi.

"Taküm ni mengudangba tesem ka nung The Hornbill festival nung shilem agütsü atema pelar. Nagaland nung sobaliba reprangtsü aser Scotland indang The Highlands tera sayutsü kanga yongyar" ta Scottish artist Ruairidh Maclean (RuMac)-ia metetdaktsüogo.

Hornbill Festival nung Air India Express-i Official Travel Partner inyaktsü TSÜNGKOTEPSÜ NOKSA ENOKBA BOEING 737-8 TAYIMTSÜ AMSHITSÜ

Dimapur, November 17, 2025 (TYO): Nagaland-i Hornbill Festival 2025 atema Air India Express-i Official Travel Partner inyaktsü metetdaktsüogo.

Iba sangdong ajanga Air India Express-i nisungtem sentakteptsü tenangzükerba yur inyangshiba aser 'Tales of India' mapa ajanga India sobaliba takar sayuba kuli agütsür.

"Nagaland Tourism and the Hornbill Festival nung Air India Express-i Travel Partner inyaktsü pelashishia agizüker. Iba tesentaktep ajanga connectivity akangshir, senzürtem tiptemdaktsür aser linük o alima dang Nagaland sayur" ta CM Rio-i ashi.

"Air India Express den külemi Land of Festivals nung tourism, cultural exchange, aser economic growth atema maongkatem agütsütsü nükjiding ayur" ta paisa ashi.

"Taküm Hornbill Festival nung onoki Nagaland sorkar den sendaktepba atema kanga pelar. Onoki 'Tales of India' mapa kübok linük nung sobaliba senmang aser lisopur arts sayur" ta Managing Director, Air India Express Alope Singh-i ashi.

"Northeast nung Hornbill Festival ama tanga benjungtem

nung sobaliba aser sempettem mesayur. Onok Boeing 737-8 tasen nung Tsüngkoteptsü livery enokba ya Nagaland nung teka sempet tajung nem tetushi agütsüba lir" ta Singh-i metetdaktsü.

"Onok meyong tayimtsütem nung mezüngbuba retrofitted cabin enokbaji iba tayimtsü lir aser Land of Festivals-i arurtem pelaa agizükerba den Nagaland sorkari cultural aser tourism destination akümtsü asoshi inyakba pusema nungiter" ta paisa ashi.

Nagaland-i India aser alima tesem balala nungi tourist tem pelaa agizüksü renemba mapang Air India Express-i Boeing 737-8 aircraft, VT-BWD ajanga benjung jazüker. Iba tayimtsü nung Tsüngkoteptsü design enoka lir aser iba ya maitsü aser senmang atema tongtipang tamaittsü ka lir.

Tsüngkoteptsü ya Nagaland nung Ao kini kanga akhüm agüja abener.

November 22, 2025 nü Chief Minister Dr. Neiphiu Rio-i Dimapur Airport nung iba tayimtsü agizüksü. Air India Express-i Hornbill Festival nung artists aser organizers anir senzütsü aser Dimapur Airport nung Hornbill experience kiosk ka lapoktsü.

Air India Express-isa November 20 nungi December 15, 2025 Dimapur tashi direct aser one-stop flights atema November 20 aser 30, 2025 tsüngda book asürtem nem 15% discount agütsür. Iba discount atema parnok website aser mobile app nung promo code HORNBILL amshitsü akok.

Air India Express ajanga anogoshia Dimapur nungi Guwahati tashi tayimtsü senzür. Ano, Bengaluru, Delhi, Hyderabad, Jaipur, Kolkata, aser Patna tashi one-stop onward connectivity lir.

Northeast region nung Air India Express-i Guwahati den hopta shia tayimtsü 126, Agartala den hopta shia tayimtsü 21, Imphal den 21 aser Dibrugarh den 14 weekly flights ajanga sendakteper.

Air India Express-i 'Tales of India' mapa kübok Nagaland nungi Tsüngkoteptsü design, Manipur nungi Akyobi, Moirang Phee aser Saphee Lanphee, Assam nungi Gamosa aser Jaapi, Arunachal Pradesh nungi Idu Mishmi, Meghalaya nungi Khneng aser Mizoram nungi Puanchei tamaittsütem ajanga Northeast nung artistic traditions nem tetushi agütsür.

DMC-i Digital Rate Board sayaogo



Dimapur Municipal Council (DMC) ajanga New Market, Dimapur nung Digital Rate Board inoka aliba noksa nung angur.

Dimapur, Yimpoksüi/Nov. 17 (TYO): Dimapur Municipal Council (DMC) ajanga November 17, 2025 nü New Market, Dimapur nung Digital Rate Board sayaogo, kong osettsüset jenjang sayua nüburtemi yangji repranga lijaliyong sütettsü.

Nüburttem asoshi market rates nung ochishia shishilempatsü atema iba sentong ya tongtipang mera ka liasü.

Sentong ya Wolumo Humtsoe-i anir agi aser Pastor Rokothozo Sophie, KBC ajanga sarasadem.

DMC indang CEO, Thungchabemo Tungoe-i iba sentong nung o tatsüka jembidang Municipal Council ajanga public services nung yimya tasen amshitsü meranga inyakba indang lemsatep aser iba inyakyim tila ya ajanga Dimapur tejakleni aoba indang sayur, ta ashi.

Tanü Dimapur tesem asem nung digital rate board inokba ya tetenzüker lir aser ano tesem balala nunga inoktsü. Consumers

atema osettsüset jenjang sayuba ajanga DMC ya ajak tim yimya nung aser ochishia aser technology tejakleni aoba den lirumedema aliba sayur, ta pai ashi aser counsellor tem dang iba ama temelenshi tila tenzüka pei aliba metetdakja Dimapur yimti tejakleni anir aotsü ayongzüka liasü.

Shishilempaba nung ochishia aser nüburttem mangmangtepba ajemdaktsütsü atema iba digital system ya yanglu aser iba ya ajanga anogoshia osettsüset jenjang, telemsa balala nung jenjang atetba tali tejangjaba nung aser ajaki züngtettsüsa sayutsü, ta ashi.

Paisa business house dang parnok indang oset aser services tem advertise asütsü aser digital board chart ajanga DMC-a revenue angutsü ta metetdaktsü. DMC ajanga tongtipang sentongtema item board nungya sayutsü aser revenue nungi ano timba inoktsü, ta ashi.

Market Review Committee (MRC) indang Convenor, Neingutoulie Kenguruse-i iba sentong ayongzüka nükjiding

lemsatepdang market inyakyim tajungba nung ketdangsütsü aser consumer temi osettsüset jenjang shidak metettsü atema digitization ya kanga tongtipang lir ta ashi.

DMC indang market regulations aser price control branch ajanga Supermarket, New Market aser Murki Pati nung nüburttem asoshi Digital Board ya inoktsü, ta pai metetdaktsü.

Kasa mapang paisa business establishment ajunga dang benjong mapang pei dokan tem tebour junga yanglua ki naro inoktsü aser Dimapur tebour tajung tesem ka kumdaktsütsü ayongzüka liasü.

Digital Rate Board ya DMC Chairperson, Hukheto Yepthomi-i sayatsü.

For complain & redress atema mobile number 9862929908, 8837207162, 7005697120, 7085473756 nung tongteprateptsü aser osettsüset jenjang nung aibelener dang senchi sen 3000 (Retail) aser 6000 (Wholesale) achitsü, ta metetdaktsü.

GHSS Diphupar 'A' nung Multi Skill Lab semzükogo



GHSS Diphupar 'A', Chümoukedima nung Multi Skill Lab tajungba kuma yanglushir semzükba sentong nung CSR Regional Lead, LIC Housing Finance Ltd., Abhinav Das den ketdangsür aser kaketshirtem külemi tangokba noksa ka yangi angur.

Dimapur, Yimpoksüi/Nov. 17 (TYO): Government Higher Secondary School (GHSS) Diphupar 'A', Chümoukedima nung Multi Skill Lab tajungba yanglushir November 17, 2025 nü semzüka liasü. Principal, GHSS, Diphupar ajanga pela agizükba o jembia sentong tenzüker.

Sentong akhumdong Abhinav Das, CSR Regional Lead of LIC Housing Finance Ltd. ajanga Nagaland nung lanurtem nem tashi agütsütsü nükjiding nung tenzüka project nung shilem agitetba atema pelaba lemsatepa liasü.

CSR sentong ajanga

Northeast nung skill ecosystem tashi itshidaktsütsü atema LIC HFL inyakyim pai lemsatep aser tang tasenba kuma yangluba lab ya angazükba aser takum aliba sendaktepja training models yangerba mangdang nung shilem ka lir, ta ashi.

Lend a Hand India aser Samagra Shiksha Nagaland ajanga kanga junga amalitep akaba aser mapa kuma inyakba atema tenüngsang agüja liasü.

Mission Director, Samagra Shiksha, L. Jamithung Lotha-i tajungba kuma yanglushir aliba lab ya state sorkari tarutsü asoshi renema aliba shisaluym atema

bendanga agütsür inyakba kuli ka lir, ta ashi.

Iba facility yagi vocational learning yariba kisüng masü saka kaketshir tem rongnung yimya tasen amshitsü lenmang sayutsü, ta pai ashi.

LIC Housing Finance Ltd. aser Lend a Hand India ajanga yariba asoshi pelaba lemsatepdang, iba ama teka amteper inyakba ajanga shisaluym nung temelenshi adokdaktsüba sayur, ta pai ashi.

Paisa school ketdangsür, tesayur, trainers aser technical teams tem dang pelaba lemsatepa liasü.

Kohima Police-i traffic advisory metetdaktsür

Dimapur, Yimpoksüi/Nov. 17 (TYO): Southern Angami Youth Organisation (SAYO) ajanga November 18, 2025 nü tesunep nung rally ka ayongzüksü aliba dak sendakba nung Kohima Police ajanga traffic advisory ka metetdaktsüogo.

Rally ya anepdang 10:00 ako nung PHQ lenjem nungi tenzüksü aser Deputy Commissioner Office leni oa tezüluba nung takhangba ka agütsütsü.

Iba sentong tiptema agitettsü mechi anepdang 9:30 ako nungi tenzüka iba sentong matem tashi traffic ozüng temelenshi kar alitsü.

Iba mapang Agri-Forest nungi PHQ point leni aoba gari tem Fira Junction nungi Para-Medical tsütsü yoktsü.

Para-Medical tsütsü nungi TCP Gate leni aoba gari tem Nagabazaar - Pezielietsie (Tinpatti) leni divert asütsü.

Pezielietsie (Tinpatti) - Nagabazaar nungi TCP Gate/Box Cutting leni aoba gari tem Para-Medical leni divert asütsü.

Iba sentong mapang Mezhr Junction aser Middle Midland nungi gari adoktsü memelatsü.

Martyrs' Park Junction aser PWD Junction nungi adokba gari tem iba mapang TCP Gate leni meyoxtsü.

Nüburttem aser gari nung senzür temi amalitep akatsü ayongzüker. Item ozüng sülen anidakba ajanga traffic tajungba nung senzütettsü aser ajak atema anisüngzüker asütsü, ta Kohima Police ajangasa ashi.

Kohima nung State-Level SHG Exhibition-cum-Sale alitsü

Dimapur, Yimpoksüi/Nov. 17 (TYO): DAY-NULM aser DJAY-S pilot initiative kübok State-Level SHG Exhibition-cum-Sale sentong ka November 19-21, 2025 anogtem Old NST parking area, Kohima nung anepdang 9:30 ako nungi tenzüksü, ta State Urban Development Agency (SUDA) sangdong ka ajanga ashi.

Iba sentong yagi Self-Help

Groups (SHGs) lungjemdaktsütsü, talisa tetsür temi anir aliba enterprise nung ranglokttsü, aser SHG entrepreneurship jenjang ajungkettsü nükjiding nung ayongzüker, aser market exposure tajungba kumdaktsütsü aser enterprise development aser pei sasa pei peria takum aliba nung yaritsü, ta sangdong ajanga ashi.

Nagaland State Human Rights Commission-i Tizit semdang

Dimapur, Yimpoksüi/Nov. 17 (TYO): Nagaland Human Rights Commission indang Chairman, Justice Songkhupchung Serto den züngsem Adv. R. Nzanbemo Lotha nungeri November 17, 2025 nü Tizit semdanga sorkar indang department balala nungi ketdangsür aser stakeholders tem asoshi awareness sentong ka ADC, Tizit indang Conference Hall nung ayongzüka liasü. Sentong nung ADC, Tizit, Relise Sangtam menden liasü.

Chairman-i Human Rights Commission tentetba indang tongmelang agi lemsatepba mapang, Commission ya Civil Court ka ama tashi agüja lir aser yangji obendang agütsüba ya tongmelang aser angati lir, ta ashi.

Commission ajanga ken o kar agiba indang lemsatepdang, health, education aser chiyongtsü amala basic rights ya peria agütsüra, nüburttem jenjang kanga agi tajungba nung alir, ta pai ashi.

State la asoshi tongtipang

teinyaktsüji nüburttem kumzüka ayutsü aser teyari agütsütsü ya lir, aser State-i aji meinyakra mesüra pei temeden nung aibelena inyakra, Human Rights Commission tetsüng ajemoker, ta ashi.

United Nations ajanga agizükba Universal Declaration of Human Rights ya Laishiba sülenbo tongtipangtiba document ka ama züngshir, aser yangji mezüng meyonngem agütsürtem rongnung India lir, ta Justice Serto-i ashi.

Nagaland State Human Rights Commission züngsem Adv. R. Nzanbemo Lotha-ia Commission aser parnoki semdangba nükjiding tongmelang agi rasaa ashi.

Iba mapang parnoki sendaktepa aliba department nungi ketdangsür aser lokti tentet balala nungi lenirtem den sensaksema liasü.

Iba mapang parnoki Tizit nung Community Health Centre, Government Higher Secondary School aser Police Station semdanga liasü.

Fire & Emergency Services-i NOC/Fire Safety Certificate atema metetdaktsür


Dimapur, Yimpoksüi/Nov. 17 (TYO): Khuret tajemba kumdaktsütsü aser mapang agia inyakba ajemdaktsütsü mechi No Objection Certificate (NOC)/ Fire Safety Certificate nungdakba applicants temi NFES Act, 2021 indang application form (firm "D") junga fill up asüa (building plan, site plan, layout plan, fire safety measure plan, etc amala nungdakba documents den) Officer-in-Charge dangi yoktsüla, ta Department of Fire & Emergency Services,

Nagaland, Kohima ajanga metetdaktsü.

IOs/Asst. IOs, OCs temi 'fire and life safety' inoktsü atema site inspection aoba sülen iba inspection report ya FHQ nem nungdakba documents (tekalen shia aliba ama) agütsütsüla.

IOs/Asst. IOs danga inspection agiba/tesem semdangba, inspection anogo aser mapang, Fire station nungi meta kobika pilar, occupancy yimya amala recort tejangja anepalua ayutsüla, ta Department ajangasa metetdaktsü.

Bangladesh-i Hasina meyipa yoktsü
mepeshia India dangi shiti züluogo



Menden 243 agi kümtetba assembly election nung menden 200 dak tema akokba sülen NDA pur kanga tashi ita sorkar tasenba kümtettsü lir. Election nung BJP puri menden 89 akok aser JD(U)-i menden 85 koka liasü.

Jeddah nung Consulate General of India-i ashiba agi, parnoki Saudi nungen ketdangsürtem aser Riyadh nung India Embassy den sendaktepa inyakdar. "Asür kinungertem den tongteprateptsü atema Embassy aser consulate ketdangsürtemi Telangana nung ketdansürtem den tongtepratepdar," ta kasa sangdong ajanga metetdaksü.

Lai party toktsüba sülen anogo ka lir la
tebilembatem lemsatop aser yimjak nung teti
Tejashwi Yadav nem teyari agütsür,
Haryana nungi MP Sanjay Yadav aser Uttar
Pradesh nungi political kibong ka nungi
Rameez na aija liasü. Lai election nung RJD
puri shilem junga magitetba ya tena dak tai
tonglokja liasü.

International Crimes
Tribunal (ICT-BD)-i
Hombarnü, taoba küm
Bangladesh nung kaketshirtemi

Arishi küm 78 tain lenir yagi
Bangladesh court-i pa
obendangsü atema meyipa
arutsü tetuyuba agütsüba
manga. Hasina-i okadak la
anema ken o benokba ya
magizük aser lai kecha
aibelena mali ta shia arudar.

ਪੰਜਾਬ ਨੈਸ਼ਨਲ ਬੈਂਕ <i>...harje ka prateek!</i>	 punjab national bank <i>...the name you can BANK upon!</i>
ASSET RECOVERY MANAGEMENT BRANCH (ARMB), GUWAHATI (823100) 1st Floor, Zonal Office, Hem Baruah Road, Pan Bazar, Guwahati-781001 (Assam), Email: cs8231@pnb.bank.in	
Ref: ARMB/GUW/13(4)/02/2025	Date: 13.11.2025
<u>POSSESSION NOTICE</u> (Belenshitsu makokba kiojentem)	
Securitisation and Reconstruction of Financial Assets and Enforcement of Security Interest Act, 2002 kùkòb tashì agùja aliba Punjab National Bank ketdangsùr ama aser Security Interest (Enforcement) Rules, 2002 kùkòb Section 13 (12) aser Rule 3 nung tashì agùja aliba amshì 06.08.2025 nù sen apur/ Guarantor(s): Mr. Alhou Kesiezie, s/o Keduosievie Kesiezie, Prop.-: Oriental Trade Agency/Lozi, Hyundai/IT World, L-Khel Kohima Village, Below G Rio School, PO-Kohima, Nagaland-797001, Mobile no. +91-8416007800 (Borrower), Mr. Seyekuoilie Kesiezie, s/o Neihu Kesiezie, United Traders, Kohima Main Town, Kohima, Nagaland-797001, Mobile no. +91- 9436005033/ 9774020614 (Guarantor) dang 01.02.2021 nù tashi nung Rs. 4,05,64,109.93 (Rupees four crore five lakh sixty-four thousand one hundred nine rupees and ninety-three paise only) apua aliba aser 06.02.2021 nungi tetemlok aser tanga taah ajak osang agùtsùba sùlen anogo 60 tsùnga ajak aotoktsù takhangba osang agùtsùr. Sen apuri sen maotetra Act kùkòb section 13 nung sub-section (4) aser Security Interest (Enforcement) Rules, 2002 rule 8 nung tashì agùja aliba amshia tekùboklen rasa shia aliba kiojen aser ali 2025 kùm November 13 nù nungi agir ta nùbertem aser sen apur nem metetdaksùr. Nùbertem aser talisa Sen apur/Guarantor(s) tem dang iba kiojen aser alidak sendakba nung kecha inyaksangshi masùtsù metetdaksùr aser inyaksangshi sùra Punjab National Bank, Kohima Branch, Nagaland nem 01.02.2021 nù tashi nung Rs. 4,05,64,109.93 (Rupees four crore five lakh sixty-four thousand one hundred nine rupees and ninety-three paise only) aser 06.02.2021 nù nungi tetemlok aser tanga taah ajak den SARFAESI action mapa entokba ajak agùtsùtsùla. Act kùkòb section 13 nung sub-section (8) dak ajemdaker borrower's /guarantor's/mortgagor's tem dang atakzùkja aliba mapang tsùnga kiojen meyipa agùtsù metetdaksùr.	
<u>Description of the Immovable Properties</u>	
Property No-(1) Mr Alhou kesiezie S/o-Shri Keduosievie Kesiezie meyong kiojen aser ali ajak koba L-Khel Kohima Village, Dist-Kohima, Nagaland nung lir aser tasazùk 2500 Sqft aser Plot No-3179, Patta No- 4396(New) lir. Arrtsù:- North- Stream, South nung - Govt. Land, East nung :- Sri Alhou'er ali, west nung:- sorkar ali. Property No-(2) L-Khel Kohima Village, Dist-Kohima, Nagaland nung aliba Mr Alhou kesiezie(Angami) S/o-Shri Keduosievie Kesiezie indang ali aser kiojen ajak, koba tasazùk 1440 Sqft aser Plot No-224, Patta No. 4231(New)/258(Old) lir. Arrtsù:- North-NAPO Building, South nung -Foot path, East nung:- Sri Neizekuo'er ali, west nung:-NH-61. Property No-(3) Purana Bazar, Dist-Dimapur nung aliba Mr Alhou kesiezie S/o-Shri Keduosievie Kesiezie indang ali aser kiojen ajak, koba tasazùk 6875 Sqft aser covered Dag No-618, Patta No-336, lir. Arrtsù:- North nung- TC Akumba Ao'er ali, South nung Mrs Lhoutuo Angami'er ali, East nung:-NH-39, west nung:- L Lhoutuo'er ali. Property No-(4) Sector C Diphupar village, Dimapur, Nagaland-797115 nung Mr. Alhou Kesiezie s/o Mr. Keduosievie Kesiezie indang ali aser kiojen ajak, koba tasazùk 118544 sq. ft aser Permit no. 486/05 dated 25/ 06/2005 lir. Arrtsù: North nung: Village Road, South nung: hri Zavilie Angami'er ali, East nung: Alhou aser Rongen Wati na ali, West nung: Main Road Property No-(5) Sector C Diphupar village, Dimapur, Nagaland-797115 nung Mr. Alhou Kesiezie s/o Mr. Keduosievie Kesiezie indang ali aser kiojen ajak, koba tasazùk 37220 sq. ft aser by Permit no. 562/05 dated 27.06.2005 lir. Arrtsù: North: Shri Sashi & Yantsumong na ali, South: I Wati & R Wati na ali, East: Sector Road, West: Shri Alhou'er ali. ** SARFAESI Act kùkòb Section 13(2) dak ajemdaker 06.08.2025 nù Mr. Alhou Kesiezie aser tanga nem tekhangba osang agùtsùba nung banki agia aliba kiojen aser ali amenoka aliba distict ya Dimapur melenà "L-Khel Kohima Village, Dist- Kohima" ta shisema lir. Anungi bank-i shitakba address ji "Dist-Dimapur" ta melenshitsu'r aser tanungba osangbo kecha memelenshitsu. Ken o dak sendaka alir ajak dang temetongshitsu agùtsùba ya temulung dang ayutsù mepeshir.	
Date: 13.11.2025	
Place: Nagaland	
Authorised Officer Punjab National Bank	



TIR YIMYIM YIMOBILEM (EDITRIAL)

DIMAPUR TUESAY, NOVEMBER (YIMPOKSÜI) 18, 2025

Naga nunger arok sabang

Tanü Chümoukedima district kübok Agri Expo nung Nagaland GBs Federation teloki Naga yimten tebilemtsü ken o ya India den tatembang kati arua latettsüsa lenmang bushiteptsü atema Naga yimten nüchiso bushir telok ajak den Naga nunger kin telungjem tentet ajak arok sabang, Common Platform, senden kati jaoka lir. Ajisüaka, Nagaland nung aliba Naga kintem rongnung aikati iba senden nung medentettsüba osang dang masü saka Naga yimten tebilemtsü ken o tatembang küma latettsü merangba mapa nung India den jembitsü asoshi Naga nunger telok aika tentet majung, anungji FNR teloki anir tawa Ungma aser Zunheboto nung Naga nunger longjemmer Naga yimten tebilemtsü akoktsü merangtsü asoshi kechi ken o sa renema lir, iba terenemba ken o jiang Naga nunger ajak arok ken o asütsüla ta metetdaksüba sangdong jagi, Nagaland GBs Federation-i ayongzükbä sentongji arok külemi kenbang obang medemdak arok sabang ka mesütettsüsa kümogo Atangji, Naga yimten tebilemtsü ken o ya kokteta jembitsüsa Naga nunger yimten telok kata mali kümogo, ibayongji India o Naga nunger na yimjung nung alitsü jembiba dak alaka, Naga yimten nüchiso jenjang ka latettsüsabo India den shingaia mejembiteter. Ano, talisa Naga nunger lokti aser yimten sabang ka kübok longjemtsü melen telemsa-ang tali tali adokba ajanga India government-ia Naga yimten temeten ken o ya kangabo metsüngareta magii alitsüa akok. Atangji, Naga yimten tebilemtsü ken o melatetteti Naga nunger kangshiba ya timtem aser takoksa ulura, anungji tekaratiba nung tatembang küma latettsü tim, ajisüaka Naga nunger külemi telemtetba agidak arok yimten sabang ka mekara, Naga nunger yimten tebilemtsü ya shingaia tatembang küma latettsütsü makoktsü. Tang Naga yimten tia yangji tsükdaka yur tesülen aoa majung aser tejakleniang mouteter ta kangshiba mapang lir. Tang tashi nung Forum for Naga Reconciliation (FNR) teloki Naga nunger telok - telok lemsar azü tokshia raratepa aliba anendaktsütetogo aser tang ya parnok ajakji arok sabang kati anir arutsü merangba mapang lir. Iba nükjidong nung, tangbo Naga yimten nüchiso bushir teloktem den masü saka Naga nunger kin shia lenirtem ajurua Naga nunger lungjemmer Naga yimten tebilemtsü akoktsü lenmang bushitepba angur. Atangji, FNR telokia Naga nunger tsüngda katepba anendaktsür külem sabang ka kümer India den jembidaktsütsü merangaka, Naga yimten nüchiso bushir teloktem den renemba ken o mapa küma meinyaktet tamakok anguba angur. Ajisüaka, tamakokjia inyakdangba agidang angur aser tamakok jagiang ano takok lenmang tajungba sayutsü alinung, ano tezü medangi maneni yimjung bushiba aser Naga nunger putepdaktsütsü merangba mapa ya tatem tashi inyaka aotsü ajungshir. Atangji, tang Nagaland GBs Federation-i ayongzükbä arok sabang senden yagi Naga nungertemi Naga yimten tebilemtsü ya yaktasa tatem küma latetdaksünüba tejangraba aser taginüba sayur. Joko, Naga nungertemi matateter. Aji oda, Naga yimten temeten ken o jembia jembia, joko, Naga yimten nüchiso indang jembiba olabo mangashii kümogo. Iba amaisa Naga yimten temeten ken o ya India den tatem küma melatettet süidaktsü nungbo, taruba küm 50 tsüngdabo Naga yimten nüchiso indang jembiba mangashitsü aser Naga yimten temeten mali akümstsü. Naga nunger telok balala tsüngda yimjung yanglutsür aliyongbo, Naga yimten nüchiso bushir telok paikaya lemsar arok sabang ka nung külemi ajurutepa Naga yimten ken o tagitsü ka mejembitetra, kenlirbo Naga nunger rongnunga yimjung yanglutsür malitsü, anungji Nagaland ya tangar masü, akhi ama, Naga nunger o Naga nunger na azü poka raradak tesemang ka kümadoktsü. Iba ama tiajika mataloktsüsa, FNR telokia Naga nunger telok aser kin ajak külem sabang kati anir marutetra aser Nagaland GBs Federation telokia Naga nunger kin ajak mulung mekoktetra, Naga yimten tebilemtsü kokteta jembitettsüba tangar dak dang imlaa melii, asen kini danga anir Naga nunger ajak kin telongjem sabang ka tenteta, Naga nungertemi Naga nunger tang aser tarutsü putu asoshi yimten telemtetba ka agitsü mapangji tang ya asütsü.

OLEMSABANG MEDEMER TAJUNG ANA (A SHORT STORY OF TWO BEST FRIEND)

~ M.Senthy Jamir

(Iba Yimdangjem otsü ya Tir Yimyim aser Bookipedia nati ayongba toktep nung Tasembuba takok jenjang anguba liasü.)

Taribi ta ajaba tepur tajung yimti tulu ka nung kenüyongi mopu ka nung, kibong ana nungi tebur chanu kaka aso. Ka anepdang terok ako nung aso aser ka nikongdang pongu ako nung aso. Tambusang tenüng Akhümpok aser tanubusang tenüng Mangidong liasü. Kiyong ka nung dang lia, tenaprongla tanur tajung, apetasong kecha mali yintetba jagi kiyonger aser yimer ajaki sakloka tenük sünga meim.

Temolungpur akümba

Kiyong ka nung aser kenüyongi asoba tanur asünung, ibaji tenadia meteta tena lanuwa nungi medemer tajung aküm. Schooli aotsüsa mapang atongnung tena school ka nung dang külemi azüngtsü tenzü. Tena kanga dang meimtepba nua medemertem aser tsürapurtem ajak temolung süngzüka tenüksünga pelatep. Tena kodanga meraratep, class nung teti aten, lesson meranga pushi, school senshir teti ki mapa meranga inyak, ibayongji tena kümshi tajungtiba takoker rongnung aden. Tena jakla yimya tajungji ajizüka par medemertem aser kaketshirtem aika tajung aküm. Tena school nung takoker asübayong küm tatem shia tenadi senpet aika agizüka par class purtem dang nungi süoshi aser nüngdakba ocet aika aliteta tsürapurtem kanga peladaktsü. Tena kati ka taoba ta meimtepa yaritepba aser meranga inyakbaji meilongi yim aikadi angashia, nua aser meteta tesem balala nungi nisung balala arua tena nungi meranga inyakba aser yaritepba shisatsü aika angazüka liasü. Tena class ter nung azüngtsü asoshii takok tulu nua kipong ananungji sayatenyatsüka pelateper mejang. Ibai pongmang asü? asangsang ta süngmangtsüsa kiba rürü mapang ka Mangidong jepjia arua Akhümpok mesoa, kübu sroke süa süogo ta metetdaksü, tena kanga arsanga oa kiyonger aser yimer ajak dang sangdong. Iba anepdang anüa madok mepet tanak agi süpang ama Mangidong molungjang anisüngzükdak maka aküm. Ayaterem nung ammag milen züksep ama, anojongi tebu süaadok nung Mangidong tekolok shisatsü ajak ramar pangka-pangka mesüngjimteti alidang; Akhümpoki pa temba Mangidong dang, nübu shia arutsü; pa kodang shia arudir yakta nür ki arua atongtsü asoshi lendi anasa pa mangji remtsütsü, anadi leper jagi llunga oa anasatiba jaka ka pushidi arung ta mesüzüka shir tena leper jagi ao. Tenadi yim lendi anasa tebu mang aremtsü jaka tajung ka magaa yur meyipa arudangbo, kiyongertem, yimtsür-yimertem aser temeimertem ajak asüpila sentong nung atentsü asoshi nüktzü neta sentepa liasü. Sannükeri asüpila sentongji agiyonga aodang, kiyonger aser medemertem ajak tenüng nung Akhümpok tebu nem tepila o jimbisü mapang agütsü. Tesenteper ajak lia mangjak nung "Tanü Mangidong tebu na alima doktsür dipo lima nung liaka, ni Akhümpok tebu kü arishi ali tashi kü chir Akhümpok dang koda meimer yamaji kasa kecha tesadang melie, Mangidong danga meimtsü aser yaritsü" nü mang ali nung marem dang ni nü mangjak nung nangzüker ta metetdaksüba o jagi mangyimertem ajak temolung süngzü. Anü tasen ka adok ama asüpila sentep nung atenertem ajak tejakji sangwa-sangwa aküm. Iba sülen telok tulu jagi longso-longsoa mangji bener oa arem.

Maneni azüngtsü teyari

Schooli aotsü mapang atong nung Mangidong aser tetsü na koma, koda süla ta temolungjang animesüngzüktet tzüngmok amoka yipru tesashi aiter ama tongdonglatsü atua jimbiteper oa pei pei takdang nung mejang. Anepdang yakta tera züngia pa temba Akhümpok par kidangi arua pa takdang kishi akoshia meso. Pa temba Mangidong aoksar tenük anetshia kishiji lapoka alua kechi asü? Lendong kar atalok asü! ta asüngdang. Tanü ana schooli oa admission agir school nung nüngdakbatem ajak ana prongla nem alitsütsü kübui ashiba ashitsü asoshi nü dangi ilunga aru ta langzü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Naga Christian Fellowship Chennai küm 40 jungogo



Dimapur, Yimpoksüi/Nov. 17 (TYO): Naga Christian Fellowship (NCF) Chennai tenzüker küm 40 ajungba den Cultural Sunday sentong ka November 16, 2025 nü agia liasü.

Iba sentong ya tejangraba tulu nung agia liasü, kong tongti o jembir Rev. Dr. Songram Basumatary, Principal, Gurukul Lutheran Theological College and Research Institute Chennai liasü.

Pai NCF Chennai nung züngsemtem dang tamangba nung akang-akanga alitsü ajungshi aser Tsüngremi NCF Chennai moatsüba bilemtettsü ayongzüka liasü.

Pai züngsem aser lenirtem dang tarutsü putu asoshi maneni inyaktsü ajungshia liasü.

Northeast India indang

sobaliba tajung, talisa ochi ashiba aser tangatetba tajung wazüka ayutsü tongtipang ta pai ashi.

NCF Chennai indang Pastor Wapangtoshi-i sentong nung salem o jembi aser tesüiba mapang aser tang aliba züngsemtem aser lenirtem dang pelaba lemsatep aser parnoki shilem tajung agiba aser bendanga agütsüba indanga tenüngsang agüja liasü.

Nagaland Baptist Church Council aser Nagaland Missions Movement ajanga len aniba aser yariba atema pelaba pai lemsatapa liasü.

Pastor Wapangtoshi-isa Nagaland nung Khristanpur ajunga dang parnok asoshi sarasademtsüba aser amalitep akaba atema pelaba lemsatep aser NCF Chennai

tenüng nung Nagaland aser Tamil Nadu sorkar temi Chennai nung aliba Naga nunger asoshi bilema yariba atema pelaba lemsatapa liasü.

Paisa alima tesem balala nung aliba NCF Chennai partners aser teyariteper ajunga dang alakteta pelaba lemsatapa liasü.

Iba anogomung nüngtem nung "The Journey of Faith: 40 Years of the Naga Christian Fellowship Chennai" nüngja agütsür magazine ka Rev. Dr. Songram Basumatary-i sayatsü.

Sentong nung Vuto K. Chishi menden liasü, Bartley Noel Dkhar, Shim & Friends ajanga temeja ken tem aten, kong kin balala nungi nüburtem adenshia shilem agia liasü.

Linük 45 nungi Khristanpuri Zion Church pastor chioktsü akhanger

Yimpoksüi/Nov. 17 (Agencies): China den tesendaktep tajung aliba linük 45 nungi arogo lenir aser züngsem 500 dak temai China nung senior pastor Jin "Ezra" Mingri densema Zion Church lenirtem pua aliba asoshi online prayer petition ka nung meyongnem agüja liasü.

Iba meyongnem agütsürtem nungya Argentina, Brazil, South Africa aser India dena lir, koba China-i alima tesem balala nung infrastructure nung senotsü indokba tasa - Belt and Road Initiative nung dena lir mesüra China densema emerging economies indang bloc, BRICS nung dena lir.

Pei linük tesendaktep aliba nung ajemdaker China nung timtem balala ajurua aliba arogotem atema linük balala nungi Khristanpuri lungjemer ola adokba tang ya mezüngbuba alitsü, ta Hudson Institute fellow aser Jin'er jala kinungbi Bill Drexel-i ashi.

Iba sarasadem ya Jin'er kibongi zülua prokshi, kong China lenirtem dang tamangba yimsü temeden ajanga linüktem amokmerener masü tashi itshidaktsür ta angatettsü aser tekeraba nung Jin aser dangar arogo lenirtem chioktsü, aser tarutsü nung Khristanpur China nung sadoksayima külemtsü aser

tamangba yimsü mechi tetsübo makai alitsü ayongzüka liasü.

"China nung Nü sülen anidakba yong reshikangshia amshiba, tenokdangba balala agütsüba tamanger ajunga atema sarasademtsür," ta sarasadem shilem ka nung shia liasü. "Parnok mamadok aser alima tesem ajunga nung aliba Khristanpur temi parnok atema sarasademtsür aser alimai parnok timtemba ngutar ta metettsü," ta iba sarasadem shiti nung zülua liasü.

Chinese Communist Party ajanga Khristanpur apuba aita aser lenirtem chioktsü ayongzüka Bodhbarnü US Senate nung party telemsa makai pangzüng ka agizüka liasü. Hopta tetenzüklen China ketdangsür temi Zion Church lenir pezü bail nung chiok. Ano nisung 18 shi Beihai, China nung tepuokdak lir. Parnok ya taruba hopta temerenshi agütsütsü amai lir.

Pua alir lenirtem timbai okatsür tem den ajuruteper aser Jin ya temang, tanüla aser tekolok shisatsü junga lir, ta Zion Church indang interim lead pastor Sean Long-i ashi.

October 19, 2025 nü Jin-i tepuokdak nungi shiti ka züluba nung arogo dang tasü aittsü ayongzüka liasü. "Ni atema shisa tebulu. Osang tajung atema ni yangji timtem tila ajuruba nung anisüngzük angur," ta pai zülua liasü.

China sorkar dang American arogo kisüng masü saka alima nung aliba arogo temi külem tamanger meshidaki amshiba indang bilemer ta sayutsü nükjidong nung iba sarasadem ya ayongzü, ta Drexel-i ashi.

China-i BRI aser BRICS inyakyim ajanga anitsü imla aliba linük aika nung aser talisa Global South nung nüt süng timba evangelical lir," ta Drexel-i ashi. Item linük nung arogo lenirtemi maneni yimya balala nung iba ken o nungshitsü sentong lir, ta pai ashi.

Zion Church nung Deobar shia maneni tekülem sentong agir aser sentong ya Zoom aser kidang mesüra restaurants nung tamanger 5 aser 50 tsüngta adenshia alidak broadcast asür.

Tawa lenirtem apuba ajanga arogo züngsemtem tsüngta mangatettep adoker, talisa osang ola meshidak belenshiba, reshikangshi nung telangzüba agütsütsü asoshi tebilemba balala aser tejashi, tetsübo ajanga tangatetba balala akumer.

Iba arogo nungya counseling center ka lapoka tepuokdak yua aliba pastor tem kinungtsü aser tanurtem nem counseling agütsür.

Züngsem karbo tetsübo nung arogo yutsüogo, saka nisung tasen tem sentong nung adener aser baptir ta ashir.

ANOGO ABEN TSÜNGREM DEN

Sermon tajungtiba

"Nenok tamang atitangba agi taremzü, adokdaktsür, ta meteta aji kanga tepelatsü ta züngshiang" (Yakob 1:3).

Alima nung sermon tajungtibaji pulpit nungi jembiba ya masü, shirang yipden nungi jembiba ya ang lir. Tsüngremer ochi o taroktibaji aiben timtem tekangshi ajangshirtemi sayur, aser aika parnok nungi angazüker.

Tajung anogo ishiba aser timtem toushi tekangshi anogo teimba ta taküm nung alir temang aiben tepelatiba nisungji asür. Temoatsü manung ang aliba takümji masü saka kidang dang moka aliba, yipden nung dang mejanga aliba taküm, shirnoki Tsüngrem dak metaloktsü angazüker, parnokji tepela tuluba akar. Parnoki Tsüngrem dang tangar ama temulung machi sarasadem kangabo masür. Tsüngrem temoatsü asoshi taküm tepela tulu nung alirtemji shirnoki aiben timtem ajangshi, parnokji lir. Parnok timtem aremzüka aruba indang (parnoki) jembibaji sermon tulutiba.

Tamang atitangba agi taremzü, aser Tsüngrem dak tainji kümdaktsür (Rom 5:3-5; Yakob 1-3-4). Anungji asenoki mamali, tang timtem ya ken atema dang, ya ajanga teti tatem makaba sentsüwangshi taretba renemer (2 Kor. 4:17-18). Timtem arudang asenoki mejashili saka aremzüka ajanga Tsüngrem temeim aser temulung tepela agi moshia aliba takümji kümdaktsüdi.

Reshikangshi tia ajurua aliba Khristanpur atema Pope-i sarasadem

Vatican City, Yimpoksüi/Nov. 17 (Agencies): Mass in November nung Pope Leo XIV ajanga Catholic nunger dang akhi mapang nungi timtema aruba aser tatem anogo Yisu-i pa dak amanger teimla temenen-i mesamatsütettsü nangzüka bilemtettsü ayongzüka liasü.

"Tanü alima tesem balala nung Khristanpuri timtem aser reshikangshi tia ajurur," ta pai November 16 nü St. Peter's Square nung Angelus sarasadem sarasademshitsü asoshi adenshia aliba nisung 40,000 dang ashi.

"Ni talisa Bangladesh, Nigeria, Mozambique, Sudan aser danga linüktem asoshi bilemer, kong nüburtem aser tekülem agiba tesemtem teti amaker," ta pope-i ashi.

Danga tensa tia lir, saka lendong timba Muslim extremists ajanga lir.

Ajisüaka Pope Leo-ibo, "Tsüngrem ya taochi akaba tebu aser par chir ajunga rongnung yimjung lidaktsüner," ta ashi.

Pope-i Congo kübok North Kivu province nung aliba Khristanpur asoshi alakteta sarasademja liasü.

Byambwe jila nung November 14 nü Islamic State

den sendaktepa aliba telok, Allied Democratic Forces ajanga Presentation Sisters temi lapoka aliba clinic ka maka nisung 15 tepset aser yangji aliba mozü aser osettsüset auyar clinic ya rongdoktsü. Parnok ya anasa aliba ki bushia oa ano nisung pongu tepset, ta Vatican News ajanga shia liasü.

"Azüdokshi ajunga anentsü aser tamanger temi arok ajungtsü asoshi külemi inyaktsü atema sarasademi," ta pope-i ashi.

Russia-i Ukraine yimtitem amakba tembangtsü asoshia Pope Leo-i sarasademtsü.

"Yangji iba ama amakba ajanga tanurtem densema nisung asür aser yirur, aser civilian infrastructure kanga raksatsür, temokong arudang kibong tem talidak ki maka yutsür. Asenoki rara aser teraksatsüba ya yimya ka ama makumtsüla! Timtem tuoshi ajurua aliba Ukraine nung teti asoshi yimjung alitsü atema asenok külemi sarasademi."

"K h r i s t a n p u r reshikangshiba ya meshidak amshiba aser nok-nü ajanga kisüng mataloker, saka o agi, aser aji tiazü jembiba ajanga aser mashi leni tangatetba melenshitsüba dena lir," ta pai ashi.

AO OSHI ANGAZÜKDAK:**TANÜ ANGAZÜKTSÜBA OJANG****Tsükarunga**

(adj) tangsa tang ta aritepba (hasten)

* Tanurtemi tsürabur dang tsükarunga sen tera meshir ao.

Tsükbhong

(n) tsükjung aika alentepba (bunch of paddy, sheaf)

* Tsükbhong ajak jentang bendena ayur.



Tir Yimyim

OLONG PAITEP # 7333

	1				2			3		4
5								6		
7			8							
								9		
		10								
11										12
					13					
					14					
15										

TIPLÉN

- Balaka
- Aika shirangba
- Tar tatsü
- Nenü'er jabaso
- Sen latettsüba
- Tangar kübok alir
- Lon nung inokba
- Tzü ayimdak
- Ajak

-

(5)

-

(4)

-

(6)

-

(4)

-

(7)

-

(4)

-

(6)

-

(4)

-

(5)

LANGTSÜNGLEN

- Hai sür inyak
- Aor tenüing ka
- Ali telungi talangka lur
- Tebang kenyongi mazüoker
- Ken atema anenzükertem
- Toktepa noktak
- Sen
- Benjong agi
- Telung nung rizünga ayu
- Tebang nung enok

-

(4)

-

(6)

-

(5)

-

(4)

-

(5)

-

(6)

-

(4)

-

(5)

OLONG PAITEP # 7332 TELANGZÜBA**TIPLÉN :**

- Aben, 4. Artsü, 7. Lisem,
- Liwa, 9. Sarasadem,
- Aket, 14. Mangu,
- Anünü, 16. Ango.

LANGTSÜNGLEN :

- Aruli, 3. Balala, 5. Suwar,
- Belem, 9. Süjak, 10. Aonung,
- Dokan, 13. Tinu.

NAI-A YA METETTER

Karnataka nung Guru Nanak Public School, Bidar küm 50 ajungba tenüing nung sentong ka agiba Guinness World Records nung züluokogo.

Guru Nanak Dev Engineering College sports ground nung sentong agidang nisung teimtibaji Rubik's Cube inyakteta liasü aser iba ajanga otsü tasen ka yanglutet.

November 9, 2025 nü kaketshir 5,434 külemi Rubik's Cube inyaktet aser Guinness World Records nungi representative Swapnil-i kuli agütsü.

Asür Tadu Haro atema Itanagar nung candlelight march agi

Itanagar, November 17, 2025 (Agencies): November 16 nü arishi küm 12 tain cadet Tadu Haro atema temeten meshia Itanagar nung candlelight march ka agiogo.

Asür Tadu ya tan ita tetenzüklen Sainik School Niglok, Pasighat nung asü.

Deobarnü sentong nung adenertemi Akash Deep nungi Tennis Court, Indira Gandhi Park tashi "Justice delayed is justice denied" aser "Say no to ragging" tezülubatam amer jaja.

Iba sentong ya All Nyishi Youth Association (ANYA) ajanga ayongzük aser kaketshirtem, Nyishi nunger aser telok balala nungi teshimtet nübotem aden.

Haro teyi Tadu Lunia-i o

jembidang state sorkar dang tekaraba nung bushisüngdang asütsü ayongzük.

Iba sentong nung Apatani Students' Union tanishirtemia temepishiba balala agütsü.

Onoki tashishitsü melii aser mapang züngzük bushisüngdang südaksünür. Mapang agiba ajanga public-i temulung malem tuluba akümer ta Tadu Lunia-i ashi.

"Iba school nung kaketshir 8 nem bail temelaba agütsüba atema jashir. Okadak ya temeten agütsüba tesemtem lir saka ibala maparen ajanga ozü kibong temeten angutsü teimla samar" ta laisa ashi.

"Kaketshirtem rongnung kabo judge tongtipang ka tanur lir ta onoki angazükogo. Onoki

ola madoker ta ser zübazülema malitsüla. Onoki judiciary nung tamang akar saka zübazüba inyakba ya magizükür" ta Tadu-isa metetdaksü.

November 10 nü iba ken o mezüng angadang Special Investigation Team (SIT) ketdangsüba IPS officer den ajuruteper aser idangji pai onok nem temeten agütsütsü ta ashi saka itemjiji amajok kümer ama bilemer ta laisa ashi.

"Mezüngbo school administration-i ozü kibong dang tai tonglokja alir ajak meindoktsü ta nangzük. Ajisüaka parnok ajak school hostel nung aliba osang angazükogo. Iba ya okadaki tetuyuba lir ta Vice-Principal-i shiogo" ta Tadu-isa ashi.

Assam nung cyclists-i Zubeen Garg nem tetushi agütsü

Guwahati, November 17, 2025 (Agencies): Sports Authority of India (SAI)-i Assam kübok Sonapur nung commemorative cycle rally ka ayonga agiogo.

Parnoki asür Zubeen Garg'er kidang nungi cycle rally tenzük aser Zubeen Kshetra nung tembang.

Zubeen-i fitness, cycling, aser sportsmanship asoshi tenangzükba takang aliba atema iba sentong agir ta tayongertemi ashi.

"Zubeen-i teti sports aser fitness ajungmeso. Onoki pa senmang nem tetushi agütsür aser pai jembiba taküm

lidaktsütsüba onok mapa lir" ta cyclist kati ashi.

"Onoki pa tasoba anogo matongdang iba rally ajanga pa nem tetushi agütsütsü atema sentong renem. Onoki pa mang rongdokdak süngdongtem atemtsü aser diya ka tsükloksü" ta ano tanga cyclist kati ashi.

Modi-Shah kübok BJP atsüngdoktsü makok: Ratan Nath

Agartala, November 17, 2025 (Agencies): Prime Minister Narendra Modi aser Union Home Minister Amit Shah na lenisüba kübok Bharatiya Janata Party (BJP) madak takok angutsüji tamakoktsü ta Tripura Power Minister Ratan Lal Nath-i ashi.

Bihar Assembly elections nung BJP-i takok tulu anguba atema Mohanpur assembly constituency nung bike rally ka ayonga agidang Nath-i iba ya ashi.

Iba rally nung bikes 1,000 tema shilem agi aser party workers, lanurtem aser tetsürtemi kanga longsoa aden.

"Nübotem aser talisa tetsürtem o lanurtemi terenlok, sorkar ketdangsübaren tajung aser Swadeshi tangatetba atema vote enoktsür" ta Nath-i ashi.

"Nübotem terenlok aginür. Terenlok melira kecha



meinyaktettsü. Tanü ration angati, lenmang tajungbam, national highways, education, healthcare, drinking water aser electricity agi kilen ajak tongogo" ta paisa metetdaksü.

Taoba mapang Bihar nung Lalu Prasad Yadav kübok "jungle raaj" liasü aser ibaji Tripura nung Left sorkari tim mesüi ketdangsüba den mesüktepa liasü. Tripura nung nübotem 2018 nung ochimashi aser sorkar tim mastüba anema

vote enokja temelenshi bener aru ta Nath-isa ashi.

"Prime Minister Narendra Modi aser Union Home Minister Amit Shah na ali tashibo BJP madak takok mangutsü. PM Modi lenisüba kübok India tashitait linük ka akümba ya nübotem nguogo aser iba ya Bihar election results ajanga sayur" ta paisa shisem.

Communist Party of India (Marxist) "double zero" kümogo aser Indian National Congress (Congress) tesamar dang lir. PM Modi den sendaktepba regional party temi development agenda nungi tajangzüktem angutsü ta Nath-isa metetdaksü.

Tripura nung CPI(M) tanaben meyipa marutettsü kechiyong nübotem parnok magizüktsü. BJP aser PM Modi madak takok angutsübaji tamakoktsü. West Bengal nunga BJP-i takok tulu angutsü ta paisa ashi.

GOVERNMENT OF NAGALAND
DIRECTORATE OF HEALTH & FAMILY WELFARE
NAGALAND : KOHIMA

No. DHFW-5-23/TRG-NSG/2022/2360-63 Dated, Kohima the 17thNov. 2025.

DECLARATION OF RESULT FOR ANM/FHW EXAMINATION 2025-2026

In pursuanceto this Department Advertisement No. DHFW-5-23/TRG/NSG/2022/2158-62, dated, Kohima the 11th June 2025. Basing on the marks obtained from Written and oral interview, the following candidates have been declared as selected to undergo ANM/FHW Training Course at School of Nursing, District Hospital Tuensang for the Session 2025-26.

1. General Category Roll Nos :

103 98 66 594 155 390 460 398 215 216

229 724 61 459 479 204 27 666 96 682

11 416 364 213 458

2. BT Quota Roll Nos :

486 672 605 260 704

3. Waiting List Roll Nos :

254 601 721 315

NOTE:

1. Admission/Placement orderwill be issue on 20thNov. 2025 from 11:30 AM at Conference Hall, Directorate of Health & Family Welfare.

2. The Candidates are to bring their ANM/FHW Admit Card.

Sd/-

Dr. MERENINLA SENLEM

Principal Director

Directorate of Health & Family Welfare

Nagaland, Kohima.

Taoba Bangladesh PM Hasina tasüba agi merenshitsü obendang agütsü

Dhaka, Yimpoksüi/ November 17 (Agencies):

Bangladesh nung war crimes court kati Hombarnü taoba Ato Kilonser Sheikh Hasina tasüba agi merenshitsü atema obendang agütsüogo. Taoba küm kaketshirtemi anir longkak aitba mapang tashiyim amshia azüoktsü atema ozüng agütsüba asoshi la aitsüogo.

Küm aika tsüngda taoba mapang Bangladesh nunger lenir ka anem tang jenjang tesashiba agiogo. February ita parliamentary election agitsü lia iba obendang ya agütsüogo.

Hasina-i aniba Awami League party pur iba election nung metokteptsü atema tenokdangba agütsüogo, aser Hombarnü iba obendang agütsüba ajanga ano linük nung election magi tsüngda

mepetmesü adoktsü ta tsübua bilemer.

Linük yimtiba Dhaka nung amendaka aliba Bangladesh indang International Crimes Tribunal, domestic war crimes court-i Hasina meliaka iba obendang agütsüogo. La taoba küm August ita India-i jena oa liasü.

Meimchir anema jenjang agiba atema Hasina taküm tepeyong tepuokdak ayutsü obendang agütsü aser taoba küm mepetmesü adokba mapang nisung aika tepsetba atema la tasüba agi merenshitsü obendang agütsüogo.

La tasüba agi merenshitsü atema obendang agütsüba sülen okadak nüburtemi teka ma-a pelatepa agizüka liasü. Iba obendang ya Supreme

Court dangi abentsü koka lir.

Ajisüaka Hasina'er jabaso aser adviser, Sajeeb Wazed-i obendang agütsütsü lia Reuters dang ashiba agi, Awami League dena shilem agia democratically shimba sorkar ka mekümtetra parnoki SC dangi ken o mabentsü.

Ken o obendangba mapang prosecutor temi court dang, lai 2024 küm August ita kaketshirtemi anir longkak aitba mapang parnok azüoktsü atema tashi yim amshitsü asoshi tetuyuba agütsüba parnoki ngutetogo, ta ashi.

United Nations report ka ajanga ashiba agi, 2024 küm July 15 nungi August 5 nü tashi nung longkak aitba mapang nisung 1,400 tepseta liasü. Parnok ya timba security forces temi khaset.

Tir Maduro-i aniba Venezuelan cartel ka foreign terrorist sangdongtsü: US

Washington, Yimpoksüi/ Nov. 17 (Agencies): US Secretary of State ajanga Cartel de los Soles ya foreign terrorist organization ka ama tan ita sangdongtsü telemtetba agiogo ta metetdaksü, koba Venezuela Tir Nicolas Maduro aser danga ketdangsür temi anir lir ta Washington-i ashir.

"Department of State-i November 24, 2025 nungi tenzüka Cartel de los Soles ya Foreign Terrorist Organization (FTO) ka ama sangdongtsü tebilemba lir. Cartel de los Soles ya Venezuela nung amenoka lir, aser iba telok nung ketdangsür ya Nicolas Maduro aser par danga ketdangsürtem

lir, shirnoki Venezuela indang military, intelligence, legislature aser judiciary ochimashi kumdaksü," ta Marco Rubio-i Deobarnü ashi.

Asen hemisphere ajunga nung kiralongra azüdokshi inyakba aser United States aser Europe telungi temesepba mozü shibelena bener aitba ya Cartel de los Soles aser Tren de Aragua aser Sinaloa Cartel densema danga FTOs tem mapa lir, ta pai ashi.

"Maduro mesüra par tempartem shinga Venezuela indang chichiba sorkar tenüng nung masü," ta pai ashi.

Caribbean nung US mitkar tali akumba aser Deobarnü ang

alima nung aircraft carrier tulutuba tonga aruba mapang ka nung iba sangdong ya agütsü.

July ita US Treasury Department ajanga Cartel de los Soles nem tenokdangba agüja iba ya "Specially Designated Global Terrorist" nüngja agütsü aser iba yagi Tren de Aragua aser Sinaloa Cartel nem senotsü teyari agütsür ta shia liasü.

Iba cartel tenüng ya anü indang insignias nungi agizükba lir, koba Venezuelan mitkar ketdangsür indang uniforms nung teti angur, ta Treasury-i ashi.

(Maneni tapak 8 nung...)

In Loving Memory of Lt Rongsensangla Jamir 18th November 2024



Azüngmeyaka aser müpelateti Küm süia ogo. Anogo süia aodang onoki ne menürem jakden khen danga reprangdangner aser Na maliba onok akümlirtem kanga nemjemer. Mangyimba ya olasü balaka lir aser tanü tashi iba kensü Ola den jajatsü onoki meranger.

Nai onok dang süoshi koma arütsü sayu onoki bilemteter aser nai Temiem agi iba Ki jara aser tongnü arüteba toktsüba onoki anogoshia ajangshir. Nai onok dang tanen makai koma sür meimtsü, kati ka anepalutsü aser tejashi timtem mapang nung tamang ayutsü sayu onoki kodanga mamar. Anepdanga, Teroto mapanga aser aonunga Ne akümlir jakden aser inyakyim onok nüklai arur. Hao, tanü nai onok teka nung mamitaka, Na onok molung taroktiba nung teti lir.

Tanü onok nüktzü aser mulung zürep ajanga dang onoki na mebelimteter saka Nai Ne taküm koma temiem aser taochi nung ali iba asoshi tenungsang agütsür. Na teti onok asoshi anüdoklen petinu koba agi onok tatem makaba kidangi anir. Tanü onok inyakyim ajak nung Na onok mulungnen aser teti nü dak azüiter. Ne temiem agi onok tanüla teti jangrudaktsür. Onoki Na menungra bilemteter.

Temeim Kinungbu, Jabaso, Tenu, aser Kinungertem.

SANGDONGER

14th Buba Marsosang Football Trophy 8th Dec. 2025 nungi tenzüka asayatsü. Anungji, tejangratem asoshi form item dokan tem nung angutsü.

WALOK, Mokokchung & Tems Entreprises,
Chuchuyimlang
Contact No. : 9612454540 / 7628083503

Prize

Champion : Rs. 1,50,000/-
Runners Up : Rs. 1,00,000/-
Semi- finalist loser : Rs. 10,000/- (each)

Co-Sponsor

- I. Semi Finalist Loser (Rs. 10,000/- each)
Shri. Maongyanger. JE RD Block Tsurangkong
Pongen Automobiles Hyundai Mokokchung TVS
- II. Individual (Rs. 5,000/- each)
Best Player : Shri. Bendangtoshi Kichu,
Lead Bank Manager (Tuensang, Noklak & Shamator)
Best Goal keeper : Sangyu Lkr. Dimapur
Best Defender : WALOK, Mkg
Highest Goal Score : Gilgal Proprietor, Chuchuyimlang
- III. Best Team (Rs. 8,000/-)
Lt. Imtisunep Family.

Sd/-
(NUNGSANGTEMSU)
Convenor
Organizing Committee MFT

DR Congo: Copper, cobalt mine ka nung apu ka chirepa nisung 32 asü

Kinshasa, Yimpoksüi/ November 17 (Agencies): Democratic Republic of the Congo (DRC) kübok copper aser cobalt mine ka nung nisung tali nongtepba ajanga apu ka chirepa nisung 32 asü, ta ketdangsürtemi metetdaksü.

Iba lendong ya southeastern Lualaba province kübok Kalando mine nung Honibarnü ataloka liasü. "Tzünglu kanga sashia aruba aser anentsü alutsü ana nung aliba ajanga iba tesemi maotsü atema

tenokdangba agütsür liaka wildcat miner tem iba tesemi oa liasü," ta Mayonde-i ashi.

Tzü agi metsünger aliba tesem ka adentsü atema khen asoshi yanglua aliba apuba ya aritepa adena aoba mapang chirep, ta pai ashi.

DRC indang Artisanal and Small-Scale Mining Support and Guidance Service, mesüra SAEMAPE-i ashiba agi, iba tesem nung sepaitemi injang khaloktsüba sülen miner tem aoksatepa liasü.

Iba sülen miner tem iba apu

yagi aritepa ao aser apu nungi tsüka pangtepba sülen aika asü aser aika yirua liasü, ta kasa sangdong ajanga metetdaksü.

Mayonde-i iba lendong nung nisung 32 asü ta metetdaksü saka iba osang ajanga ashiba agi nisung 40 taküm samaogo.

SAEMAPE sangdong ajangsa, iba mine nung wildcat miner (iba tesem nung mapa inyaktertem achaayangba telok) aser iba tesem ketdangsütsü atema temelaba ngur alirtem tsüngda mapang talangka mangatettep adoka arudar.

National Human Rights Commission atema provincial coordinator Arthur Kabulo-i AFP news agency dang ashiba agi, Kalando nung wildcat miner 10,000 dak tema inyaksangshir.

Provincial ketdangsürtemi Deobarnü iba tesem nung inyaksangshi masütsü tenokdangba agütsüogo.

Meimchir temeden wazüka ayutsü atema inyaktertemi, iba mine nung nisung asüba dak sendakba nung military inyakyim indang

bushisüngdangtsü ayongzükogo aser ashiba agi, iba tesem nung miner aser sepaitem mangatettep adoka liasü.

Ken o dak sendakba nung military-i kecha telangzüba magütsü.

DRC ya alima nung cobalt adokdaktsürtem rongnung tulutiba lir aser linük nung cobalt atuba ya China nunger company temi shilem 80 bo azüoker lir. Cobalt ya electric garitem atema lithium-ion battery aser tanga oset balala yanglutsü atema amshir.

G. Rio Memorial Volleyball Trophy tenzükogo



Urban Development and Municipal Affairs Advisor Zhaleo Rio den ketdangsürtem aser asayartem G. Rio Memorial Volleyball asayamung lapokba sentong nung tangokba noksa nung angur.

Dimapur, Yimpoksüi/November 17 (TYO): G. Rio Memorial Volleyball Trophy (12buba Kohima Open Tournament) November 17 nü Kohima Local Ground (Khuochiezie) nung tenzükogo.

Iba asayamung ya Kohima District Volleyball Association (KDVA-i ayongzük aser November 17 nungi 20 tashi asayatsü. Asayamung nung state aser tanga state nungi tetsür aser tebur team balala toktepdar.

Asayamung lapokba sentong nung Advisor Zhaleo Rio, IAS (Retd.) alaketa jaoker liasü.

Sentong nung o jembiba mapang Advisor Zhaleo Rio-i, asayamung ayongertem aser asayamung nung shilem agirtem dang kanga pelaba lemsatep, koba pa tebur asür Guolhoulie Rio nüngdem nung ayongba asayamung ka aser Nagaland nung iba asaya ajungkettsü atema sabang tajung ka lir, ta ashi. Paisa, iba asayamung küm shia tajungba tajungba ayongzük asayaba atema

KDVA nem tenügsang agütsü.

Saisabong indang jembiba mapang Zhaleo-i, taküm libaliro aser yimayimpong azüoktsüba, rangloker asayatsüba aser meranga inyaksü koda tongtibang iba indang lemsatep. Pai asayartem dang parnok yimayimpong, taküm libaliro asüngtetsütsü aser parnoki shima asayaba asaya nung temaba jenjang tonga asayatsü asoshi bendanga agütsütsü ayongzük liasü.

Zhaleo-isa, par kibongi iba Memorial Trophy ya maneni nongita yaritsü tenangzükba agütsüba den KDVA lenirtem dak tamang akaba lemsatepa liasü.

Kasa mapang nung Kohima District Volleyball Association, tir Visasiele Suhu-i, association-i ayongzük asayaba iba asayamung dang ya G. Rio Memorial Trophy ta ajatsü ta ashi. Paisa, iba Memorial Trophy ya taoba mapangbo Northern Angami Students' Union-i ayongzük asaya liasü saka anenogo, ta ashi. KDVA iba asayamung asüngsashitsü

atema telemtetba agi aser asür Guolhoulie Rio'er kinungertem nungi temelaba meshia liasü, shirnoki asayamung takok marok aser senpet agütsütsü mulungsua agizük liasü. Suhu-isa, nüngja melenba dang ashi asayamungbo kasa dang lir, ta shisem.

Pai taküm iba asayamung nung Nagaland, Assam, aser Manipur nungi tebur team 13 aser tetsür team 12-i shilem agidar ta ashiba den, tetsür team timba akümba atema pelaba lemsatep aser iba asayamung takok asoshi teyari agütsüba asoshi team tem dang pelaba lemsatep.

Takoker nem agütsütsü aliba senpet:

Tebur asaya:
Champions - Rs. 1,50,000,
Runners-up - Rs. 80,000 aser
Semi-finalists: Rs. 25,000 (each)
Tetsür asaya :
Champions - Rs. 80,000,
Runners-up - Rs. 50,000 aser
Semi-finalists: Rs. 15,000 (each)
Jurila senpet (tetsür aser
tebur): Best Spiker - Rs. 5,000
aser Best Setter - Rs. 5,000.

Deaflympics: Anuya Prasad-i gold medal angu



Yimpoksüi/November 17, 2025 (Agencies): India nunger shooter Anuya Prasad-i Hombarnü Tokyo Deaflympics nung tetsür 10m air pistol asaya nung gold medal nguogo. Kasa asaya nung India tsürsa Pranjali Prashant Dhumal-i silver medal ngua liasü.

Anuya-i iba asaya ya akokba dang masü saka Deaf Final World Record (DFWR) tasen ka yanglua liasü.

Hombarnüsa Pranjali-ia

Qualification World Record (QWR) yanglua liasü. Qualification nung la ajak dang temaba jenjang nung liasü.

Shooting asaya nung India nunger asayartem maneni kanga junga asayadar aser Abhinav Deshwal-ia tebur asaya nung silver medal ngua anogo ana tsüngda India nunger asayartem shooting nung medal tenetbo nguatokogo. Deshwal shibai Qualification World Record menepa liasü, pai point

235.2 ngua Korea nunger asayar Tae Young Kim sülen tanabuba jenjang nung tembang.

Tetsür asaya nung Anuya-i qualification nung point 564 ngua la tasembuba jenjang nung qualify asü. Kasa mapang nung Pranjali-i point 572 ngua QWR yanglushi aser la temaba jenjang liasü.

Final nung arishi küm 19 tain Anuya yagi kanga junga asaya-a mezüngbuba series nung point 52.5 angu aser iba sülen lasa tejakdang sür asaya tembang. Lai ajak senteper point 241.1 ngua world record tasen ka yanglu. Taoba küm Hanover nung Deaf World Championships asayaba mapang gold anguba sülen la tang agi tanabenbuba international asayamung ka nung gold medal nguogo.

Kasa asaya nung Pranjali-i point 236.8 ngua silver medal aser Iran tsür Mahla Samiee-i bronze medal angu.

Australian Open atema Satwik aser Chirag na renemer

Yimpoksüi/November 17, 2025 (Agencies): India nunger tebur badminton tarep asayartem rongnung temaba jenjang nung aliba tarep Satwiksairaj Rankireddy aser Chirag Shetty nati anir Mongolbarnü nungi tenzük Australian Open Super 500 asayatsü.

World No. 1 jenjang nung hopta 18 aliba sülen tena May ita No. 27bubai asepzük alu, saka maneni meranga asayar tang No.3 kümogo. Australian Open nung Satwik aser Chirag na mezüngbuba asaya Chinese Taipei nunger Chang Ko-Chi aser Po Li-Wei na den asayatsü.

Kasa asayamung tebur kija asaya nung India nunger asayartem rongnung temaba jenjang nung alisang Lakshya Sen aser pa den HS Prannoy nata asayaba angutsü.

Küm tepeyong junga masayateti arur Sen-i tawa asayamung ka ana nungbo junga asaya arudar aser pai Hong Kong Open nungbo final tonga asayaogo. Almora nungi arishi küm 24 tain asayar yagi taoba hopta Japan nunga junga asaya-a semifinal tonga asayaogo. Pa iba asayamung

nung mezüngbuba asaya Chinese Taipei nunger asayar Su Li Yang den asayatsü.

2023 World Championships bronze medallist Prannoy-i taoba küm iba asayamung nung final tonga asayaogo. Pa taküm iba asayamung nung mezüngbuba asaya Canada nunger asayar Brian Yang den asayatsü.

Tebur kija asaya nunga Kidambi Srikanth, fifth seed Lin Chun-Yi den aser US Open champion Ayush Shetty Malaysia nunger asayar Justin Hoh den asayatsü. Ano Kiran George, Kenta Nishimoto aser Tharun Mannepalli Denmark nunger asayar Magnus Johannesen den asayatsü.

Iba asayamung tetsür kija asaya nung India tsürtem rongnungi Aakarshi Kashyap kija asayatsü. La mezüngbuba asaya top seed aser Olympic champion An Se Young den asayatsü. Tetsür tarep asaya nung Treasa Jolly aser Gayatri Gopichand na Yan Fei Chen aser Liang Ching Sun den asayatsü. Tarep temeyoktep asaya nung Mohit Jaglan aser Lakshita Jaglan na Canada nunger tarep Nyl Yakura aser Crystal Lai na den asayatsü.

BENDANGLI OSANG : Tapak 7 nungi...

Tir Maduro-i aniba Venezuelan cartel ka foreign...

Temesepba mozü anendaktsür... Onoki parnok shibelener ta tai tonglokja US sepaitemi tenük yoka 21 ben meteta amakba sülen US Tir Donald Trump aser Venezuela Tir Maduro tsüngta tensa mejungi kumogo.

Cartel de los Soles ya foreign terrorist organization ta Trump-i sangdongba ajanga US mitkar temi Venezuela nung Maduro indang rongsen aser ki o jen nung tenük yoker.

"Ibaji ajanga onoki aji inyaksü melar, saka onoki aji inyaksü ta mashi. Onoki Maduro den jembishinü kar alitsü akok, aser kechi koma asüjar repringtsü," ta Trump-i osangbener dang ashi.

Administration-i Venezuela nung mitkar mapa inyaksü atema congress temelaba menügdak ta US tiri nenshia ashi. "Onoki Congress dendaktsüner. Onoki temesepba mozü ayoker aser mozü asen linüki aitba nungi

temelaba magiyonga kecha masü. Saka parnok nem metetdaksütsüji tajung," ta pai ashi.

State Department ajanga ashiba agi, foreign terrorist organization nüngja agütsüba sangdong agütsür anogo tenet tsüngta Congress-i repringshitsüla aser Congress-i menokdangra, ibaji mapa kuma amshitsü.

Foreign terrorist organization nüngja agütsüba ajanga item telok dak tenük yoktsü United States nem temeden agütsür, ta küm tetenzüklena Rubio-i shia liasü.

"Asenoki parnok ya temesepba mozü shibelena ayokba telok ka ama masü saka armed terrorist organizations ama amshi tenzüktsüla. Temesepba mozü ayokba ya parnoki inyakba kiralongra mapa ka lir, aser ajidang masü," ta pai shia liasü.

BILEMDANGANG

"Ochishir temulung nung taitsuba agi timtem masür."